

## Cun ün'otantina da propostas

**La Regenza grischuna rinforza la promoziun dal rumantsch e dal talian. Sco prüm vain fundà ün post da coordinaziun «Administraziun plurilingua» ed examinà propostas per fortifichar la plurilinguità grischuna.**

Cun ün'otantina da propostas per masüras prevezza il Chantun da resguardar plü ferm ils bsögns da las differentas gruppas linguisticas chantunales. El voul eir surtour üna rolla activa sün seis chomp d'incumbenzas. «Il Chantun ha tut per mans quist proget causa il rapport «masüras per mantgnair e promover las linguas e la cultura rumantscha e taliana in Grischun», declera il cusglier guvernativ Jon Domenic Parolini. Quel rapport vaiva cumpilà il Center per democrazia Aarau per incumbenza da l'Uffizi federal da cultura (UFC). «Quist uffizi ha surdat il rapport al chantun Grischun, cul giavüsch d'implementar e metter in pratica masüras proponidas i'l rapport.»

### Post da coordinaziun plurilingua

La Regenza ha decis da s-chaffir ün nouv post da coordinaziun «Administraziun plurilingua». Quel dess gnir domicilià sco post da stab i'l Departamaint d'educaziun, cultura e protecziun da l'ambient (DECA). «Il post da coordinaziun dess sustgnair ils uffizis da l'administraziun chantunala a realisar las directivas tenor la legislaziun da linguas», declera il minister d'educaziun Parolini, «ma eir cusgliar acturs dadour l'administraziun chantunala, sco cumüns e regiuns, in dumondas chi stan in connex culla realisaziun da la Ledscha da linguas.» Plünavant dessan ils respunsabels dal post examinar, sch'ulteriuras propostas da masüras sejan realisablas e far propostas a la Regenza. «Il böt es da dar daplü preschentscha a la plurilinguità in Grischun.»

### Incumbenza per prümas masüras

Sco cha Jon Domenic Parolini disch sun gnüdas elavuradas var 80 pro-



Il cusglier guvernativ Jon Domenic Parolini maina il Departamaint d'educaziun, cultura e protecziun da l'ambient.

fotografia: Samedia

postas da masüras concretas: «Quellas fuorman l'instrument da lavur per l'ulteriura planisaziun da la promoziun da linguas.» La prüma part as drizza als uffizis chantunals. Illa seguonda part vegnan formuladas masüras chi vegnan attribuidas a las singulas organisaziuns linguisticas Lia Rumantscha (LR) e Pro Grigioni Italia-

no (PGI) sco eir la Fundaziun Medias Rumantschas (FMR) ed otras instituziuns dadour l'administraziun. «Bleras masüras dessan gnir integradas illas cunvegns da prestaziun cun quistas organisaziuns linguisticas», declera il schef dal DECA. Quistas cunvegns dessan gnir renovadas l'on 2021. Al medem mumaint sun ils uffiz-

zis gnüts incumbenzats da realisar prümas masüras.

### Cun rapreschantants dals uffizis

Las propostas da masüras sun gnüdas elavuradas in üna prüma fasa d'üna gruppa da lavur proponüda per quist intent. Quella cumpigliaiva rapreschantants da differents uffizis e da la Chanzlia chantu-

nala. Il DECA ha surdat la direcziun da quista gruppa a la firma Input Consulting SA, Berna/Turich. Quista firma ha tanter oter fingià accumpagnà la realisaziun d'ün rapport davart la bilinguità i'l chantun Berna. Davo sun gnüdas consultadas las organisaziuns linguisticas, sco eir ulteriuras instituziuns dadour l'administraziun. (fmr/fa)

## Chi vess vögla da lavurar a Nairs?

**Daspö 32 ons lavuran a Nairs in l'anteriura chasa dals bogns da l'hotel Scuol-Palace minch'on üna trentina d'artists. Uossa invida la Fundaziun Nairs als artists chi lessan lavurar qua i'l prossem on da s'annunzchar.**

Il program internaziunal «Artists-In-Residence» da la Fundaziun Nairs dà ad artistas ed artists la pussibilità da lavurar duos fin maximalmaing ses mais a Nairs. Il center cultural as rechatta in l'anteriura chasa dals bogns da l'Hotel Palace a la riva da l'En. «In general lavuran durant ün on var trenta persunas in noss nouv ateliers cha nus vain in chasa», declera Iris Aschwanden, ella es manadra da la comunicaziun, mezs d'infuormaziun ed arrandschamaints. Chi sajan minchatant eir artists chi's partan ün atelier, cuntinuesch'la, «quists ateliers provaina dad occupar adüna da favrer fin november.» Uossa tschercha il center a Nairs artistas ed artists per l'on 2022.

### «Da tuot las spartas da l'art»

La Fundaziun Nairs surdà stipendis per üna dimora a Nairs: «I pon s'an-



L'aua da l'En chi cula sper il center cultural Nairs es minchatant eir funtana d'inspiraziun per artists ed artistas da tuot il muond.

fotografia: Nelly Rodriguez

nunzchar persunas da tuot las spartas da l'art», explichescha Aschwanden, «nus vain qua adüna blers chi fan art figurativa, ma i vegnan eir persunas

chi fan otra art, per exaimpel musica, litteratura, performances e minchatant eir scienziats.» A Nairs lavuran minch'on persunas da tuot il muond,

da l'America, Asia, «ma adüna eir da la Svizra e dal Grischun». S'annunzchar pon eir artists indigens, i'ls ultims ons han pudü lavurar a Nairs

Flurina Badel e Regula Verdet, tuottas duos da Guarda. «Causa la pandemia dal coronavirus eschna quist on ün pa main internaziunals, ils artists e lur collegas derivan tuots da l'Europa, impustüt Germania, Austria e Svizra.» Pervi dal corona han ils respunsabels stuvü suspender l'avertüra dals ateliers previsa als prüms favrer: «Nus sperain da pudair far quai al principi da marz.»

### La giuria chi fa ingon la tschercha

La tschercha da las artistas ed artists chi pon lavurar a Nairs fa adüna üna giuria da perits. Quist on sun quai Katharina Ammann da l'Aargauer Kunsthau. Ella es eir commembra dal cussagl da fundaziun Nairs. Lura fa part da la giuria Damian Jurt chi'd es curatur dal Museum d'art grischun a Cuaira. Barbara Basting chi maina pro la cità da Turich, secziun culturala, il ressort art figurativa es eir da la partida. «E'l quart commember da la giuria es Christof Rösch, nos manader artistic da Nairs», disch la manadra da la comunicaziun dal center a Nairs. (fmr/fa)

Ils interessats per ün stipendi a Nairs han temp da s'annunzchar fin als 30 avrigl da quist on sün [www.nairs.ch/anmeldung](http://www.nairs.ch/anmeldung).